

**Bekas Ketua Polis Negara Bimbang Provokasi Perkauman  
Bernama  
11 Mei, 2013**

KUALA LUMPUR, 11 Mei (Bernama) -- Bekas Ketua Polis Negara Tan Sri Musa Hassan bimbang dengan provokasi perkauman di laman sosial sekarang kerana ia boleh mengugat perpaduan negara.

Beliau berkata Malaysia tidak akan mencapai sasaran menjadi negara maju pada tahun 2020 jika semua kaum di negara ini gagal bersatu padu.

Katanya, provokasi sedemikian boleh memecahkan perpaduan kaum di negara ini jika ia tidak ditangani dengan berhati-hati oleh kesemua pihak yang terlibat.

"Saya harap kita tidak bangkitkan (perkara) begitu lagi kerana ini akan menjadi masalah keselamatan, kita iktiraf kita ini hidup sama-sama dalam satu negara. Cina, Melayu, India, jadi sama-sama kita bina negara ini...orang Melayu pun tidak ada negara lain lagi," katanya.

Beliau berkata demikian kepada pemberita selepas menghadiri persidangan meja bulat mengenai politik dan kerajaan pasca PRU13 anjuran Majlis Bekas Wakil Rakyat Malaysia (Mubarak) di sini.

Soal menyentuh kaum banyak dibincangkan di laman sosial kebelakangan ini ekoran keputusan PRU13 menunjukkan kebanyakan masyarakat Cina mengundi pembangkang.

Menyentuh mengenai pilihan raya umum ke-13 (PRU13) Ahad lepas, beliau berkata suasana kali ini pada keseluruhannya lebih tegang jika dibandingkan dengan suasana PRU12 pada 2008.

"Saya pergi meronda sendiri pada hari pilihan raya, (sebelum itu) ada bom meletuplah, macam-macam letupan...itu yang saya takut, janganlah lakukan perkara yang boleh rosakkan keselamatan dan perpaduan antara kaum,"

Beliau nampaknya merujuk kepada dua kes letupan termasuk letupan bom kecil yang berlaku di bilik gerakan Barisan Nasional(BN) Nibong Tebal, Pulau Pinang pada 23 April lepas.

Musa juga menafikan telah menjadi penasihat tidak rasmi kepada Majlis Penasihat Keselamatan Pakatan Rakyat seperti heboh diperkatakan di media sosial milik pembangkang baru-baru ini.

"Tidak, saya ni sesiapa minta nasihat saya datang, pasal saya nak tengok negara kita aman, saya neutral (berkecuali) dan tidak masuk mana-mana pihak", katanya.

Beliau menasihatkan mereka yang tidak puas hati dengan keputusan pilihan raya baru-baru ini merujuk kepada saluran yang betul dan membuat petisyen di mahkamah.

"Pengundi hantu sudah banyak kali dibangkitkan pada setiap kali pilihan raya, (tetapi) lepas itu tidak (ada) bukti (langsung) yang menunjukkan ada pengundi hantu," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=948973>